

四庫全書

集部

欽定四庫全書

集部

公是集卷十五

侍講學士<sub>臣</sub>羅國俊覆勘

武英殿纂修編修<sub>臣</sub>吳廷選

欽定四庫全書

公是集卷十

宋 劉敞 撰

五言古詩

聞王十八除檢討

倉海有蓬萊去人初不遠  
舟車自難到方士曾空返  
聞子騎鯨魚姓名已金簡  
誰云路幽險但怪波清淺  
俯窺紫貝闕洞視白玉版  
神仙豈學致變化絕微顯  
乃知淮

南藥力可及雞犬相望雲霧深冥冥白日晚

任城道中

驅車太山下過憇任與樊此地昔建侯邈哉羲皇孫市  
朝非一世茂草空平原三十餘萬歲忽如飛鴻奔毀墓  
骨已銷但有石擲存縱橫委路隅冥漠游岱魂古今一  
邱貉成敗誰復論區區東家翁乃復哀璵璠牛山顧千  
駟涕下何由諉忠義獨不朽庶幾長者言

陳橋別隱直

柔遠在無外，飲冰寧顧家。  
旌麾辭北闕，原隰生光華。  
水涸雨亦收，勁風卷驚沙。  
送車何其多，高蓋垂文綢。  
張侯平生親，情義固所加。  
哀我志慷慨，睠我天一涯。  
出宿水上亭，暮談見晨霞。  
百里亦已遠，心乎不云遐。  
我自東西人，豈能守蓬麻。  
周爰愧靡及，敢不重拜嘉。

答江鄰幾到潁州見寄并封示晏公送行

日夕風雪佳，相念思乘興。  
忽憶君在遠，離憂紛難定。  
入門對新詩，滿眼冰玉瑩。  
因疑君居側，恍惚不自勝。  
別來

雖無幾日月稍已逝一葦悲河廣況乃山川迴遠遊殊  
風土孤響謬羣聽常恐弔原憲夫子歎何病幸傳丞相  
篇復見仁者贈懸知愜真賞有以誇厯聘何用慰索居  
一朝再三詠

寄深甫兄弟時在潁

回面簿領役終歲無一欣思君阻晤語坐想如古人百  
里非遐方書疎絕相聞亦知平生懷未為疎數分昔君  
幸見憐約禮博以文今也知不及矐然已絕塵裹飯更

欲馳潏潏風雪晨高會汝潏間千秋愧荀陳

舟次潏上寄貢甫

我詩持寄君宛在汝水潏君詩欲寄我蒼茫烟浪深寒  
水爭赴壑駛流激清音扁舟泝游往寂寞嗟獨尋潏烟  
稍塞望淮月初清心恨無知賞同樽酒誰獻斟相思意  
不極宛抑訴鳴琴曉燈半明滅抱膝成苦吟

古意三首

相逢偶相識相識竟相離會知別情苦寧作未相知相

見如夢中夢中還相見薄帷鑒明月恍惚仍對面

主父昔未仕頗為鄉人輕上書雖晚達稱說何縱橫不  
忍脫粟飯甘為五鼎烹豈不愛厥身徒為喪其生吾聞  
南山翁軒冕不得榮

柳下不違俗獨恥伐國言三黜何嘗憂一問遂慘然世  
衰狙詐用賢者防其源孟軻不言利顧有仁義存何乃  
百世後功名為時敦

秋意四首



陰蟲鳴空階危葉墮高樹秋風雖昨日所遇已如故悠  
悠歲方晏采采行多露芳香日可閔宛彼蘭與杜

鴻鴈起海濱凌風自翱翔冥冥清雲間矰繳安可望千  
里一悲鳴一里一徬徨時變感自深豈伊恨越鄉

鷓鴣信多智出處能自謀非無人間畏而襲人間遊微  
風動高林梁棟生早秋歛葉從所願落實安得留

翻翻林間藿昔惟桃李華飄飄終焉薄江海無津涯榮  
華寄須臾顛顛空泥沙良無凌霜節安得復嘆嗟

雨晴率張生及諸弟到建福僧居

沈陰天氣昏忽霽景物好牆陰且殘雪池岸已芳草愁  
懷無端涯強出慰枯槁白日當青天所至豁如埽山僧  
一飯畢鐘鼓不復考庭宇若無人牕軒照丹藻徒行不  
知遠適興愜所禱如覺逍遙遊頗堪謝煩惱諸子吾宗  
秀張生一經老相顧能不言歡然屢絕倒

初鴈

翩翩南飛鴈契濶萬里道朔雪常逼秋知幾諒宜早散

兵盛西北弓矢斷飛鳥側翅鋒鏑間悲鳴觸懷抱往時  
商山翁自放亦忘老避地吾所師相望戒輕矯

始聞鴈

冬夜何漫漫北風扇淒惻始聞南飛羽稍稍過我側來  
賓無乃後恐非歲時忒朔方稽常貢物性隨變易哀音  
一何厲路遠霜雪積就陽既云歸感義寧自默胡為堂  
上士撫劒重歎激

沒蕃士

丁年仕轅門欲食萬里肉敵兵方強梁邊境日局縮是  
時十月交轉戰大河曲落日天地昏風塵蔽川陸我師  
自憑陵敵騎出深谷路窮矢交墜壯士同僂辱投身致  
網罟南向長慟哭忠義安可論功名亦已覆悠悠捐歲  
序忽忽抱心曲每生悔為禍致死倘還福夜渡黃河冰  
獨依荒榛宿狐狸鳴我旁虎豹相馳逐脫身僅毫毛夜  
動晝必伏肌膚存空骨性命半鬼籙十月到亭埃門人  
識風俗回頭復長望慷慨淚盈目憶昔萬人出今還一

身復可憐同時輩視我猶鴻鵠永棄絕域中幾時脫臣  
僕叩門謁主帥長跪向人哭可汗甚雄傑其下亦輯睦  
弩力思長策勿輕用人屬

寄子華內翰時亦宿齋是夕風雨

君居白玉堂我在紅藥署出處豈不同咫尺限相遇風  
雨聞雞鳴節物驚歲暮思君正展轉夢中亦知路

過澶州橋有感

河水東赴海還從天上回寧知今日波還復前時來岸

柳亦已萋原田正萋萋念我平生歡悵然使心哀

和江鄰幾雪軒與持國同賦二首

君居近城市每獨厭囂煩積雪成高卧故人來在門  
埽除更與塏談笑寂無喧開牕延寒月拂席置清樽  
真得酒中趣安知狐白溫

長安雖大雪車馬無休時窮巷有高士閉門獨何為  
朝烟不黔突彈琴方賦詩逍遙無忤色慷慨多逸辭  
適有感同好寄聲贈所思調高當和寡無以答君知

養雞

茅茨一畝寬生理備委曲雞豚自古昔  
養隨世俗鑿垣安其棲幼長何碌碌  
旦出四散飛暮還相從宿頗哀鴻鵠  
輩飲啄不充腹何事萬里遊羈旅傷局  
促衣冠相嫵媚庭廡更追逐未悟糞土  
非豈知稻粱辱物理常有此人情苦不  
足安見避世翁頽然卧空谷

乘小舟入朝京門訪安道

南山厭清流春光滿上頭懷人不勝意  
乘興去扁舟靜

吟日光午孤棹正脩脩固當見安道曷若王子猷

送陳竒祕校遊寢邱

世往人物非古今共滔滔聞君寢邱客因憶孫叔敖脫  
身田野間功業青雲高憂國不憂家子孫負薪勞苟無  
滑稽士亦已埋蓬蒿嗟來千戶封晚受侯王褒賢卿尚  
遺忘反慕貪與饕況彼里閭人安能厭糠糟伊昔方斷  
蛇許身輕鴻毛陰德尚有報天寧給吾曹努力道路勤  
我心良鬱陶



宴得解進士

先是予  
為監試

汝穎紀南國星極麗中州多奇兆兩漢粹氣兼九邱里  
巷含古風文章耀前修上恩榮計偕博選充詔求雜沓  
會駿骨軒昂出驂騑日余曹深識有司屬同憂攻玉固  
以石妍媸豈云侔登龜但投餌美惡非其儔堂上歌康  
鳴樽前親獻酬有功幸九錫與祭為諸侯

送胥元衡殿丞通判湖州

平生笑山濤非隱復非吏今更欲似之顛瞑老將至羨

自少日入公室  
君負清識於世寡所求能從魏闕下徑取江湖遊扁舟  
駕長風千里破高浪倚檣一清嘯佚氣橫雲上釀碧箸  
下酒紅鱗苔溪魚綵衣起為壽此樂天下無誰不慕軒  
冕顧多困朝市人生難自諧祿仕當若此

譏謝十三

利交勢相營義交氣相得千歲若旦暮萬里猶咫尺昔  
我相聞聲但嫌未相識今我相同遊又恨莫相益同時  
復同道同官又同籍平生重結交然諾亦自惜子為太

守丞我為里中客雖復戒疎數不應事形迹

宿九里潭

潭樹老垂葉蔭茲千百尋蛟潛伏遺劒魚躍應鳴琴遠客何所羨神淵涵淨心

橄欖

本草言橄欖解鯀  
鮫及酒毒最效也

吾昔評橄欖不在百果後其材中棟梁其實過橙榛俗人多未識至美或莫售材以遠見遺實以苦為詬華堂娛嘉賓甘脆陳左右此物萬里來真味寧免陋欲觀絕

倫效宜與危事遘江魚肆潛毒頃刻輒僵仆昔酒發狂  
醒千日尚沈瞋性命如危絃一絕不可救幸能服刀圭  
咄嗟反其舊此亦天下奇能使夭者壽豈殊魯連子談  
笑解紛鬪功成歸海濱不願千乘富

聞伯庸再安撫涇原

壬午九月鎮戎  
喪師復再往

西師又失律將帥各顛覆流血丹川原積屍委山谷咄  
嗟仁壽域短天生理促王命有不行國威為之劓鄙夫  
無憂責感慨祇慟哭况聞哀痛詔輟食想頗牧朝廷足

名卿多壘各含辱謀議宜深長瘡痍待湔浴使乎非常  
任天子意所屬百萬氣未蘇吾民且局縮賢人勤功名  
報國忍勞篤往者博望侯昔時來君叔再三持漢節白  
髮走川陸豈不久顛顚事業光簡牘關河據上游郡國  
同心腹征膳向五年強宗亦單獨君乘赤輪車一一詢  
比屋唐虞升平風惆悵難再沐

鄰幾過門不留戲作

陳平少負郭亦回長者車貧賤雖足羞猶問道何如此

風固宜少未謂今便無所望臺閣賢尚能念古初左轄  
塗朱漆長綬要銀魚化我不少留始知心見疎彌年寄  
祿仕竟日勞簿書相與同笑言俱幸逃空虛春秋期知  
我雅頌誨起予茲意未可忘君宜誦權輿

秋雪

剝候凋羣陽幽陰肆騰涌清霜飛雲初大雪吁不允續  
紛舞鴻鵠細碎翻蟻蝶北風故相資凍雨仍更縱泥塗  
絕行道珠璧棄郊壟我我九重高兀兀雙玉聳寒光坐

輝映凜氣彌衝擁壯士歌慷慨儒生議刑寵長年昔未  
逢噤語空多悚皇天無私尤德惠答虔鞏豈伊傷時和  
盖亦遵順動况茲秋方高民麥皆在隴龍蛇蟄既垓烏  
獸毛亦翫農夫樂休役天子寬垂拱信此豐年祥爾曹  
何必恐

秋雪寄獻臣

三年海水旁卑濕厭歎熱都城幸相從比歲秋逢雪秦  
吳乖風土南北異時節惟君歲寒姿一致乃欲別出門

顧道路冰霰埋車轍咫尺阻相過誰當慰寥泬

月夜期江梅兩君不至聞在李二審言家飲

日入更灑埽翛然庭檻空酒杯落明月白羽來清風佳興自不淺幽人無與同徘徊卧林下重露沾蘭叢

城樓

新晴彊人意步上西城樓雲烟開井邑綺繡錯田疇離離麥就熟翳翳桑尚柔懷歸感初服覽物悵淹留

子高作司諫見舉自代



智短多不堪  
冗官畧自保  
念非撥煩用  
猶覲趙魏老  
故人紫微仙  
自致青雲早  
回首記平昔  
露章慰枯槁  
先容輪囷木  
進取萬里道  
妄意巉巖石  
庶幾千金寶  
過聽為君羞  
貪名怯陰討  
人亦謂我何  
自笑方絕倒

聞子飛作諫官寄隱直

玉以三獻珍  
金以百鍊精  
錢侯困躋時  
詎免時俗輕  
感激生憤勇  
辛勤就功名  
居然取高第  
自此凌諸生  
諫官近冕旒  
地望臨公卿  
報國須薦賢  
致君在舉能  
蕭朱尚

結綬張杜猶提衡小雅紀伐木微禽識同聲此風久已  
無賢者當肯行念子早治裝復令世人驚

賀隱直

錢子飛言之中丞  
中丞奏辟主簿

三年守一官五年調一職選門萬餘人過半頭髮白賢  
愚必待次先後各循格相與為波流其誰辨白黑子今  
特招起方與塵土隔翰林誠知人

錢子飛

中丞亦好德古

來御史屬自與二府敵於今任雖卑其實名不易必將  
寄紀綱豈獨親簿籍鴻鵠須遠飛騏驎無近迹往矣勿

自疑天方佑正直

賀王純臣

昔者巖穴客多隨辟書起榮名耀山澤高閣下閭里此  
道不復振此時竟已矣不圖廷中賢有意及之于十年  
困鄉書三黜竟不仕一朝邁知音籍籍到天耳窮通諒  
有數自古多若此年華猶未晚富良方自治伐木情所  
深彈冠坐增喜請歌反招隱以激南州士

詠庭檜贈深甫

自吾卜家巷幽獨謝鄰里顧憐庭中檜常以比君子春  
秋色不變朝夕影雙峙誰言冰霰繁稍亂蕪葭毀始知  
歲寒甚慘慘不自喜悵然對之歎爾復那至此陳蔡稱  
慍見由也德可鄙天損吾能違放歌有焱氏

檜花

百花乘春輝紅白相嫵媚暫開已半落過眼如夢寐繁  
奢能幾時寂寞都埽地兒童惜徘徊婦女瞻歔歎中庭  
兩檜樹百尺浮雲際芳意不玩俗秀色亦自喜綠烟凝

參差金粟點細碎霏霏墮疎香裊裊隔清吹足明後凋  
節不與衆草類忽思折瑤花自放天宇外

初秋病中作五言呈君錫待制介夫學士

蹇淺聞聞道蠶螟自焚和負茲歲陰改閒閤秋風過濃  
露變園草號蟬翳庭柯覽時悵頽暮顧影驚婆娑平生  
江湖尚薄遊不願多奚為役外物况乃淹舊疴徂西識  
先野采菽聆悲歌今昔容不同情感殆靡他勞生共逆  
旅馳景均騰波行矣自免歸息陰安薜蘿

送王子直還斥溝

薄薄雲蔽日淒淒寒中人飛飛燕歸蟄漠漠鴈來賓  
送子獨無友悲秋空病身登山復臨水便覺二毛新

初卜潁州城西新居

羈鳥能擇木游魚知赴淵飛沈豈異意行止私自憐  
玩世本無術辟人庸得賢卜居幸樂國負廓依良田  
心與地俱遠我徒共熙然生涯亦何有聊以忘吾年

早行

虛舟却煩暑，初旦更清和。  
塵襟暫軒豁，幽興亦滋多。  
黃鳥轉深樹，良魚躍層波。  
岸花間紅紫，村叟雜笑歌。  
稍忘溯洄力，未悟歲時過。  
側肩市朝客，偃蹇奈予何。

晴日後園

羣鳥飛朝日，鳴鶴響晴空。  
宿雪乍消釋，滯陰反冲融。  
幽居亦可愛，老圃願與同。  
負暄空林下，遊目故城東。  
世事見流水，歲華指飛蓬。  
酣歌用自適，貧賤何必終。

公是集卷十



欽定四庫全書

公是集卷十一

宋 劉敞 撰

五言古詩

新作石林亭

朝廷入忌返山林往不還念無高世姿聊處可否間  
築基倣崔巍鞭石輕險艱羣玉相磊落萬峯正孱顏  
種樹亦蒼蒼激流復潺潺濁沔歛在眼崑閬若可攀  
自我嬰

世網邇來鬚毛斑邱壑成弱喪簿書常自環及爾滅聞  
見曠如遠塵寰豈敢同避世庶幾善閉關子牟困懷魏  
謝傳悲徂山茲馬可遺老詎厭終歲閒

樊口

回舟武昌郭暫往樊水上樊水何清冷樊山亦孤壯壽  
藤驗百歲喬木過十丈絕俗殊崎嶇攀緣幸可傍林端  
見漁舍戶牖相背向雞犬鳴雲中神仙豈殊狀昔聞元  
次山於馬寄荒浪鄰里俱已非陵谷平得喪茅茨固微

物蕪滅不可訪向之數卷書終隨衆人葬清時易直道  
末俗擯高尚陳迹成渺茫孤吟屢惆悵

宿州道中逢聖俞入京

翩翩河中船一西復一東相逢且不留相別何時逢黃  
鵠安稻梁有時顧池籠一為滄浪去不復思樊中哀君  
蒼髮白擾擾悲途窮努力千萬乘寄聲謝醉翁

謝學士赴闕還京師

謝之先德  
嘗典記注

公提史臣筆記注天子側日成唐虞風噩噩在典策家

聲繼純粹論著多切直周南未成書流涕嘗感激忽從  
東溟飛上拱宸斗極清淮淨無波歸馬閑且奕帝宮青  
冥間白日升曉色儒人相慶語文道宜久職公歸演綸  
誥制度期能覲

和甫自京師至

過事與日多歡憂兩如夢安知盈樽酒此國今宵共寸  
心不如昔感遇每易動孤笑破羣愁強顏不為用天河  
轉屋角缺月照樑棟燼落屢續紛良時亦倥偬驪駒晨

在門十里起相送暫醉醒不遲舊愁來更重

得鄰幾書

君乘使者車我為列郡守地理秦與越天文井兼斗夢寐且不通言笑安得同忽傳咫尺書遠愧西南風衰老容貌遷憂患志氣落聞君白紛如我亦不如昨捨書計離別忽忽三四年一日成九秋此語猶信然天地大逆旅外物不可必出處多舛馳相逢定何日尚禽晚且游沮溺長耦耕此意雖未合且當勤寄聲

答李谷同年書

歸客江南來迢迢數十里故人遺我書細字三四紙上  
言平生懷伐木義所倚下道相知心結綬方獨喜寧知  
淮陽翁棄外甘卧理不預朝廷議何由發吾子

楊彥文過

病起時節改遶池飛脊令賓交絕來往門戶常晝扃朔  
風裊閭闔凍雨翻滄溟泥塗墊后土氣象昏圓靈局促  
久增欬據梧目思瞑窅然顧環堵嗒若亡我形夫子亦

何事羈旅復伶仃  
孔懷在接漸過我  
不遑寧歲晏絕晤  
語誰當慰長醒

晚過深甫

忽忽衡門下幾希  
田舍翁有時寄一笑  
目送南飛鴻今旦  
天正佳草樹搖春容  
忽驚枝上花飄落  
隨西風偶然幽興展  
思樂古人同塵埃  
比殊深杖屨亦可通  
誰謂車馬多澹如初  
不逢

讀鄰幾泰山十二詩

宿心慕鄒魯寤寐泰山杪慷慨念遐觀滯留想輕矯人  
寰何鼎鼎羣動困擾擾安知有神靈獨立萬物表圓天  
似車蓋滄海稱池沼丹梯無留迹絕壑通過鳥古今更  
廢興萬事論莽眇七十二家舊永興耳目宵羨君能自  
力窮覽謝煩湫超然昔賢趣處覺茲世少吐詩狀奇麗  
思與雲縹緲忽如按圖畫所向得了了悠哉仲尼意信  
彼天下小

休復謹次韻和呈垂覽拙詩之作



朝躋天門路暮宿白雲杪超然六合外如翼鸞鳳矯  
運眸極遐曠收念息奔擾盤盤上絕頂獨立顥氣表  
天壁涌神泉玉龜泳靈沼凌輿無螫蟲集灌盡百鳥  
勝境窮賞踐陳迹嗟緬眇接遯終焉託真仙事殊窅  
雲路相飄飄塵途忘湫湫躡屐游已屢操觚才患少  
思軋幾沈伏神馳空縹緲謝客興不淺尚子計未了  
何時出塵籠重看衆山小

送從兄

東門楊柳深下有還鄉路之子千里行春風三月暮旅  
心常草草飄忽不可駐居者空徘徊行者亦反顧丈夫  
方貧賤四海無所遇不如轍中魚猶以沫相煦悠悠大  
江水日夕自東注何當激風雷慰爾饑渴慕

山光寺送獻臣

嘉集常苦難送歸豈辭遠檣舟故相逐携手行自挽古  
寺何崔巍深林象巖巖幽尋取乘興造適非素選寒泉  
冰深池衰草被長坂歲窮景蕭條僧老意繾綣勝賞竟

誰同相知幸非晚離懷自無極日暮仍忘返

燕譽堂飲別朱著作

歲晚節物變會難羈旅悲踈燈照四座殘菊醉空卮歌  
闕風雨起舞餘冠佩鼓天明念陳迹忽忽叢予思

以石為玉

梧臺有沈璞由来非一春時無司南駕自比連城珍寧  
如崑邱叟相與笑縹緲勿以名夸世而將暗投人

夜分東牕見月

逾望月彌晚宵分在東牕隨風漏跡隙散彩奪寒缸留  
翫坐忘寐啓書對空缸惜哉皆陳迹誰為足經邦

酬某

讀書與博簊亡羊信多岐何以消煩憂謝墅觀奕棋寓  
物多歡適吾道有張弛誰能長刺促屈首就鞅羈陳遵  
嗜盃酒柏松見誚嗤袁絲沈里閭劇孟相追隨君方總  
府事吏牘正紛披走見固所願清閒在他時

酬林國華先輩

昔吾臨汝南休騎思俊賢此邦號多士今世猶依然奉  
詔選計偕至者皆比肩子時避逃我常獨懷悁悁豈我  
非其人長鯨隘蹄泉將由求之失黃鵠去不還察廉未  
塞責負課終彌年解印歸卧家百憂正纏綿聞子來仕  
門華裾燦雲烟手携一卷書金碧紛蟬聯慰我平生懷  
意好何深堅始知向難進非以相棄捐鄉評讓父兄觀  
國氣無前翰飛果自致大笑諸老先毫末為豫章衆流  
咸深淵物常積於久念子亦勉旃令名百世榮文學貴

本元愛至相期深愧無長者言

夜雨

盛陽燦微陰五月氣蘊隆天地為大爐萬物皆廢銅俯  
欲濯江漢仰思凌蒼穹縮身投蝸角救暵號天公天亦  
哀人謀玄雲送雷風須臾雨如瀉一掃萬里空有似脫  
炮烙又如逃祖龍大哉造化力因見王霸功

登呂屯田清暑亭

日永雖徂暑虛堂自清幽主人意未展政席茲城樓嘉

樹遠近合清川縱橫流好風萬里至浩蕩開客愁長嘯  
欲飛動勞生局遠遊眇然不自愜目極孤雲浮

許州西湖

羈旅懷江湖氛埃願臯壤及茲已俱適初意恨獨往樓  
觀湧參差軒檻豁高爽清光見毛髮衆影兼俯仰昔者  
廊廟客於茲濯塵網疏源不憚遠勝事日以廣美矣流  
水意當為知音賞

晚過西湖

日暮無與適，緩帶此逍遙。  
湖光悅我心，步上西城橋。  
遠烟被林莽，樓閣隱嵒堯。  
歸鳥先後飛，夕風正飄飄。  
悵然念遠渚，興盡復行謠。

睡起

日午更稍休，池上逍遙眠。  
水木澹相映，庭戶清無喧。  
時有山中禽，來鳴高樹巔。  
微風拂徑過，會意成翛然。  
有生滯形役，萬物安靜便。  
愧無淮陽績，高卧亦終年。

奉和府公新作盆山激水若泉見招十二韻



誰謂山水秀忽登君子堂乃知仁智樂不與冠蓋妨濃  
靄萬疊碧懸流百尺長列峯映落落遶舍蒼蒼氣爽  
變衡霍聲幽激瀟湘意真景自遠趣逸累已忘鳴玉無  
時續翠屏終日張賞音得虛寂寓興成軒昂夙昔慕邱  
壑邇來倦簪裳欣符洗耳願遽有尋源狂縱目寄歷覽  
挾琴寫鏗鏘但疑主人厭應接殊未央

遊五嶽觀寄鄰幾聖俞

五嶽神仙境可聞不可攀安知采真遊近在都城間樓

觀橫飛雲虎豹司重關車馬自茲止始覺非人寰層波  
漲滄溟參差出三山金銀麗宮闕日月相循環東來復  
幾時花草紛紛斑斑長楊垂輕絲若委千髻鬟氛埃無由  
及魚鳥相與閒造適不自知忽如脫沈痾那得窺壺中  
逍遙去塵闌主人自瑤盃勸客流霞殷此中可遺老豈  
獨聊忘還嗟嗟二三子世路迷險巇流光競奔走俯仰  
移朱顏誰肯委俗紛相從解朝班濯君冠與纓春谷水  
潺潺

谿上避暑

滴瀝松下雨清微  
萍際風欣然此時賞我與斯人同倦  
鳥墮水上游魚翔鑑中不言閱羣動未覺幽興窮

東館避暑

虛館含微風高梧散層陰  
逍遙敞戶牖曠蕩披煩襟  
雲光壓孤城火氣連千岑  
四海俱探湯獨清亦何心  
願傾西湖水起就三日霖  
落落抱寸誠此志誰能任

得隱直書

庭柯結浮陰深竹聽鳴鵲晚涼愛軒宇默念得佳客適  
有南遊鳥墮君一封帛眷予方幽獨慰我正相憶洛中  
輕肥地子復顛顚色富貴若可求吾從執鞭役

隱直近詣闕獻書報聞

炎暉若探湯周道行倭遲之子忍重跼斯人方病癖上  
書蒼龍闕移副鼎足司卓蹠動羣聽謂言即張弛虞卿  
萬乘相子房帝王師古事可髣髴世塗實參差天闔虎  
豹深棄我忽若遺却走國西門素衣化為緇行行屢回

首未忍從此辭賢者愛其君肯如悻悻為吾聞先達語  
進退自有時版築不為辱飯牛豈嫌遲男兒建功名或  
與老定期努力梁甫吟古人不予欺

將入京得淮南王工部書及遣壽州官船以來五  
言寄之

生理厭漂蕩三年若棲苴春深感松柏流涕望京華誰  
言數舍近局滯成天涯鬢色新二毛悵然空復嗟明侯  
平生意雖遠不云遐叩君金玉音眷我需於沙旭日明

清川扁舟問貧家雖非方外遊此亦海上槎盡日庇短  
篷不慙負舍蝸愧君濟川才引領隔雲霞何由一乘興  
世累紛如麻

答君章譽兩兒見寄

窺鏡見二毛自憐憂患餘豈惟壯心盡方與功名踈終  
歲不捉筆歷時長束書顧常念絕學正復傷離居忽忽  
莫自聊悠悠空歲除過壯而無聞我其衆人歟故人來  
江南丹轂映隼旗尚持平生意期我相得初殷勤作新

詩爛漫聯瓊琚溢美及兒曹  
倅來問起予雖知非其實  
但愧情相於矧乃筆力雄駸駸  
逼曹徐一讀必三歎何  
由望儲胥故人昔流落襟抱久不攄  
乃者始再遷通直  
承明廬蒼龍脫韝絃快馬從輕車  
神至氣自豪心廣體  
亦舒淵源未易測變化天池魚  
寧獨揚子雲其工似相  
如苟能哀顛顚有似慰空虛  
月寄三四幅窮愁直見祛

答無逸秀才寄示新文

金華神仙境山川天下無  
之子復清發自與常人殊  
問

學當世賢不違智如愚歸來守桑梓寂寞安故廬此風  
足礪俗有以光吾儒如何卧空谷自樂詩與書我辱廷  
中臣一麾寄江湖薦賢力不足相望空長吁

對酒憶諸子

此酒自足飲胡為坐無歡念我意中人四顧用長歎平  
生交遊少而復聚會難萬古膠漆安各在天一端用兵  
輕文儒諸子俱小官物生繫所逢窮達何足言但恨適  
有酒共醉乃無緣



出塞曲三首

桓桓良家子，趨趨羽林兒。  
恩讐久未報，感激氣拂霓。  
無用丈二組，不須一九泥。  
獨身斬敵首，手攬封王圭。

丈夫不懼死，所懼潛關茸。  
出身義許國，桀石賈餘勇。  
豈無親戚憐，決去甘登隴。  
人生在奮發，將相寧有種。

茫茫郊塞遠，水落原野空。  
鼓鼙濕前雨，笳吹悲後風。  
山川行無極，敵窟未可窮。  
生當取榮名，死當為鬼雄。

移葦

蕭蕭江上葦夏老叢已深悠悠文王死常懼牛羊侵遷  
根橫汙池慰我江湖心清風日夕過白鷺時見臨疎簾  
拂琴瑟綠華曠衣襟處卑節不改習靜情足欽炎暉已  
堪愛秋景坐可尋願及構明堂甘心辭故林

欲於舊州石橋作偶活臺以備遊覽先為五言

河決鉅野溢此時吾山平百川會兩澤千里圍孤城桑  
野就蕪漫石橋尚崢嶸往往有白鶴飛來羣悲鳴我欲  
覽風土因之省民耕誰能同我樂誰肯從我行楚人哀

江南倚沼而畦瀛臨高誦斯語正復傷人情當築十丈  
臺偶渚為之名上可容宴豆下堪列旆旌棹歌出中流  
簫鼓會前楹浮雲來東山落日隱北溟此樂或難忘請  
公為我評

章華臺

楚子志方盛築臺臨章華度高累百尋計產逾萬家參  
差蔽日月煥爛生烟霞侍酒皆列侯佐歡盡名娃嬉遊  
未云樂荆棘紛已芽奈何竭民力用此為盜誇蔓草匿

顏基長風卷飛沙廢興若糾纏故老猶咨嗟

曲水臺

杖履不能遠逍遙池上林微風起衆響炎日隔繁陰斐  
亶激流泉間闌語鳴禽放懷在離人寄賞欣會心既謝  
朝市喧亦忘山谷深雖知非吾室猶以開煩襟

暖景偶作

垂楊欲吐花芳草遍抽芽低風動簾幕細雨濕堤沙暖  
景蕩愁思一城千萬家

冬雨偶作

江上朝來雨城中起寒色淒淒濕塵土漠漠蔽空碧  
築場看已晚及物悵無益苞著怨下泉客子長太息

豫章儒者

豫章有儒者讀書三十年但識上古風不知時俗遷一  
聞西戎叛有意摧羣頑詣闕上封章臣知用兵權不在  
勞士卒不須役戈鋌要先正其本本正末自安臣觀朝  
廷中或有可廢員臣觀草澤中或有可用賢國家既失

此奸吏隨矯虔吏奸萬事隳外患隨因緣所以子玉存  
文公積愁顏所以汲黯亡淮南為無難天子覽表歎當  
朝常拳拳迴頭謂羣公可付史館編可使靡好爵以補  
風化源豈知貴臣忌投爾南海壖不得面指陳胸襟曷  
由宣卒走驅使行行酌貧泉名與囚隸俱位乃胥校  
聯九重竟不知猶謂列王官奈何樂堯舜乃是取危顛  
誰云遇明主未免遭棄捐遂令天下士齟舌戒勿言寧  
有死壑中安有議君前浮雲蔽白日自古同所歎豈為

此生悲我歌願臚傳

賀尹學士辟經略府

年來方苦兵邊氛蕩區夏西陲亭障盡人骨蔽荒野漢  
家飛將多程李相上下試問誰董之王朝大司馬分廷  
授斧鉞號令從此把主憂臣當辱開府納儒雅堂堂蒙  
山舊乃是謫仙者謀畫當代無胸襟一朝寫誠知鑠鉛  
鑛不合煩大治要使借前籌非公諒誰假鷹饑肯擇肉  
驥逸始流赭由來抱軒昂可得不脫灑昨聞負芻粟中

戶困楚櫓此事已大急哀哉動鰥寡兵家尚神速世務  
忌苟且願公更深謀卻敵如破瓦繒鯢埽封境疲瘵沐  
純嘏豈令魯仲尼獨贊王孫賈

鷓鴣巾

余率意作之以便當  
署其形制如燕也

遠思意而子因作鷓鴣巾慮世本遺物全生翻近人輕  
涼便肌髮瀟灑外埃塵山林有獨往此亦陶唐民

望洞庭

洞庭七百里浩蕩敵溟渤雲夢開其胸巴陵東喉舌東



流匯羣川盛漲五六月飄飄浮乾坤倚蓋低兀艱吾行  
寰海間未見此水濶峽流下衣帶島嶼盡毫末高秋卷  
氛翳兩涯浴日月何得徑寸珠晦明互出沒蒼茫蛟龍  
宅溷雜魚鼈窟太古到於今沈潛孰分別風帆引北極  
波浪限百越國絕南顧憂獻琛各通達山川非一險此  
實輔明哲俯笑三苗愚竟為獨夫滅遠遊世俗隘偶此  
耳目豁淅瀝臨清風滂沱濯炎熱蕭蕭霜林暮藹藹芳  
草歇壯觀激我懷當歌意復咽寂寥軒轅樂萬古逸響

絕慘淡虞帝魂九疑莽帶嶸沉聞屈賈輩各賜楚漢珎  
至德無復還後王寢衰缺滔滔更南征鬱鬱抱忉忉太  
湖雖云深未救懷古渴

公是集卷十一

欽定四庫全書

公是集卷十二

宋 劉敞 撰

五言古詩

同聖俞寄金山雲頻次韻

是時予方欲  
請東南一郡

我雖游都城心亦無所住  
誤得世俗償形骸寓冠屨  
少時侍吾親游覽愛北顧  
至今頗思之想見江上驚  
白頭  
曇道人夙昔竟未遇  
聞其最安禪無念無作故  
勞生有

喧寂得意無早暮塵埃未易厭  
臯壤固多趣若復乘桴行從君  
款幽素

送僧歸君山

羈旅頭髮白寤寐君山青  
遠遊負雅志舉俗笑獨醒  
西風吹新秋幽興浮洞庭  
忽見九疑峯如列枕上屏  
遼遼伯牙意寂然誰為聽  
歸客適我願歡然叩柴扃  
振錫循東道汎槎問南星  
瀟湘落君手去矣鴻冥冥  
橘柚雨初熟杜蘭晚更馨  
上方試回顧笑指江漢萍

# 入山

連山何叢叢相背復相向盤溪殆千曲險石彌萬狀或  
疑天地翻斗起渤碣浪感沓更騰凌變化倏奇壯舟車  
未為用夷夏永缺望鑿空伊誰氏重譚肇霸王茫茫千  
萬歲冉冉道交喪薄伐策已卑割據事逾妄衣冠慘分  
裂玉帛敝辭讓至仁有柔服遠馭恥懲創非無一九泥  
不乏萬人將齊讎紓九世魯錦輕百兩羊腸勞躋攀魚  
齒困沿並彼岐亦云岵易簡德固曠大哉天作詩因見

聖者量

治渠

早久溝畎廢忽雨浸我廬晨興不及屨出門自手鋤一  
直復一曲水流若江湖蚯蚓為蛟龍蟻封即邱墟生理  
避燥濕一室足有餘人事戒偷安未能輕須臾豈恨規  
摹小所傷筋力劬衰疾實使然不勝一匹雛伊昔論五  
帝每嫌盡信書及茲始欲歎微禹吾其魚

東門行

古曲言貧士不安其居妻子留之今改言  
時薄不恤賢士士欲遠逝猶顧念舊國

拂衣趨長道撫劍獨歎息并歲不易衣期旦曾一食悠  
悠風俗薄顧我若異域積金要能笑彈缺輕下客豈辭蓬  
蒿居未與塵世隔黃鵠非池禽東南舉六翮出門尚徘徊  
悲鳴念舊國何日復來還為君涕沾臆

步登南門呈府公

秋至久獨醒今旦始一醉非公愛賓客何以強茲意清  
風與人期蕭瑟萬里至落日高城西參差數間地顧茲  
景方夕悟彼歲亦逝造適常若希開懷欲誰忌暢然就

酩酊更盡酒中味

小雨

春陽轉為旱惠澤積不泄稼穡亦已晚泉湧為之竭吁  
嗟叫蒼天閭閻不可越精誠憑土龍神化空恍惚今旦  
微風來朝陰度城闕霏霏墮疎潤稍稍漏白日塵埃暫  
埽地草樹纔沐髮終宜雲漢枯尚喜雷電發帝方復威  
令世莫患妖魃寧作成湯時彌年困飢渴

淮上微雨寄天隱彥文



海風吹微雲載雨淮上來灑埽區宇間削然無塵埃四月雖徂暑幽襟為之開思我同心人閔茲千里懷悠悠日已遠勤勤首屢回安得乘輕颺相從孝王臺

細雨

小雨滿前軒濃陰不時卷隨風氣潛潤竟日花微泣池光慘澹昏樓危依微辨寒添夕景長坐逼秋容晚楚客歌沈寥吟懷孰云淺

吳九秋過西池作詩持國和之邀予同賦

三山凌波濤雲漢邈氛埃世無乘槎客安得窮昭回天  
門洞閭闔海池含風雷淵淪蛟龍室焜炫金銀臺西顙  
何蕭條百芳日已摧誰能瑩心賞喟子懷仙才時變感  
所思駐車載徘徊已秋孰願夏覽物彌歡哀韓生肆爽  
言觀變均齊諧而我拘俗者俊游日已乖欲濯纓上塵  
何時與君偕

讀雜說小書

長日無與語聊及齊諧書紛紜六合外莽眇三皇初近

既難必有遠亦非必無古今夢寐間過事蚤蚤如達生  
齊萬物曲士拘一隅苟以忘吾憂焉能識其餘

初到淮西讀書申申堂寄友

稟性實無用干名謬所望中為祿仕逼誤有世俗償組  
綬見羈縻簿書正搶攘語言畏時忌談笑憂事妨往者  
託山林未能下義皇邇來失吾真終日幾發狂期會非  
本務米鹽宣大方洒心賴篇籍發興依松篁朋友素所  
畏道路阻且長怨極倘見思寄聲慰離腸

夜讀漢書

明燈一編書往古千歲事  
值歡輒孤笑觸憤還累歎  
四旁寂無聲童僕正熟寐  
歡憤雖不同均非平和氣  
可憐自戕伐忽忽老將至  
反愛童僕愚冥然不識字

和永叔寒夜會飲寄江十

昔與江翁別酣歌國門道  
黃花落酒罇白髮藉霜草  
本謂此行遠定知此樂難  
豈意二三子復為今夕歡  
主人文章伯談道輒忘倦  
每至絕倒處恨不使君見  
鳥迹上

古書龍頭冢中器其人骨已朽感此相與醉呼問西飛  
雲游子何當返寒風吟枯梧歲月益已晚吾聞太華峰  
乃有神仙居莫逐秦時人獨結山中廬

永叔出所收古文碑碣及龍頭

銅銘示客以張飲興也

三日同景仁隣幾濟川晦叔景

紫原缺一字

呂祕校劉

判官會南曹飲五君皆尚書外郎劉呂修唐書官

秋氣迎節至

立秋前一日

涼雨乘高風車馬散北闕冠蓋會

南宮從吏殆成隱玩歲復將窮簿書幸無他談笑偶多

同郎選冠一時史才映羣公著書駭深妙聞道惴顚蒙  
但願竊餘論常此樽不空寄迹三署老不慙顏與馮

期隣幾飲不至醉作江侯詩并解座客

秋雲樂邂逅拂我榻上塵江侯舊多信今作叵信人我  
求江侯意因得江侯真乘興本當出興盡便回輪已諾  
雖可嘉將非俗中倫棄言似不誠未害方外羣江侯不  
為名名者實之賓江侯不為貌貌疎意自親作詩解江  
侯飢渴夜復晨

十月二日邀隣幾飲裴二如晦來遂留至夕

晚下渠石閣方轡得傾蓋天寒畏干人卮酒自相對裴  
侯非宿約來預心賞會吾季方家居四坐客解帶獻酬  
雜嘲謔歡笑以為快幸無俗中士形迹一不怪蟋蟀鳴  
高堂歲月聿已邁于今鮮吏責無所憂其外但當勤來  
顧數醉此庭內良無德與汝聊足紓慷慨

和貢甫瓜步詩

江介多悲風川廣不可越畏塗非吾土游子愴明發羣

山起楚蜀衆水會溟渤地險自適然天衷豈端設憑陵  
三雄際偃蹇五國未非無英雄姿于此智勇竭疑城尚  
虎踞戎馬餘飲窟人謀雖工拙神物有予奪請陳真人  
朔頗事丹浦伐風雲埽氛埃雷雨救焚暵禹功東漸海  
漢使南誚越太平自茲始盛德信貽厥

和江十雨中與持國師直飲

旦上天祿閣暮直承明廬避喧雖足慰取適固已疎佳  
雨及我暇茲晨殊晏如紛紜委冠帶高枕睨庭除熏風



散微涼潤氣浮郊墟沸聲湧江瀨暝色晦綺疏驚電時  
爍目疾雷不廢書商歌動金石塵谷盈鼃魚此樂不可  
改古人良起予惜無同音賞幽獨成離居聞君達疊疊  
樽酒會朋裾高賢卧家巷固多長者車寧無寂寞者閑  
闕講玄虛

不飲

憶昔常好飲非以酒多味親友惠茲適笑語坦無畏不  
知天地廣豈問歲月逝爾來顧可憐自覺不如意秋風

正蕭騷萬物盡憔悴頗欲濯旅懷無人共昏醉獨遊何  
時歡白眼向茲世

石頭城

石頭非人力翠壁百仞高上盤巉巖雲下激湏湧濤攀  
躋猿猱苦游涌魚鼈勞乃知百萬師未易損一毛混茫  
有開鑿形勢豈一朝太古至德世斯民各逍遙艱難非  
所嬰秦漢仍寂寥發揮自孫氏力控劉與曹基業何崔  
巍謀謨亦雄豪龍蟠與虎踞勢足萬古牢德義苟不修

忽焉亡其操續紛不一姓氣象何蕭條往者游獵區盡  
為黍稷苗前事不可忘後來鑒孔昭客行倦煩促勝聚  
愜所遭眇然抱幽想慷慨成鬱陶古人若騰波逝者日  
已滔壯觀誰與論悠悠背行舫

直舍留道粹廣淵君實聖民伯初飲是日隣幾濟  
川宴王金吾園亭不預會戲作五言寄之

校讎中祕書聞子宴城隅大第丞相府主人執金吾浮  
雲駐清唱回雪舞妖姝金罍溢醇液犀筋厭鮮腴高談

鬱不發應接固已劬我從四五公置酒此石渠開牕埽  
殘雪列俎焚枯魚欲言規姚姒小說本虞初不知散縕  
寒未覺膏粱殊從容忽竟日此樂亦誰如長安事交游  
貧富固有徒不恨我失君恨子不顧予回頭成陳迹萬  
事與化俱題詩寄餘歡毋乃笑其迂

過聖俞飲

積雨不出門局促如井蛙初晴強人意今日來君家下  
馬笑握手埽堦去塵沙銀瓶撥醅酒紫碗雙井茶黃雀

隨素魴安榴雜木瓜舉非一方物遠或萬里遐不知王  
侯宅此味何以加扶疎庭下槐燦爛盤中花春事豈不  
多遊覽何必賒與公平生親總角見髮華飲當外形骸  
語當恕喧譁縱心倒所詣相對白日斜江韓亦我徒但  
恨宿約差願使公多財此樂寧有涯

招隣幾聖俞和叔于東齋飲觀孔雀白鷗及周亞夫  
玉印赫連勃勃龍雀刀辟邪宮壘數物又使女奴  
奏伎行酒聖俞首示長篇因而報之

前日俱遠別夢中每難期何言一堂上相與同宴嬉幸  
勿卑陋巷陋巷何獨卑幸勿辭樽酒樽酒安足辭君看  
籠中禽亦有山林思習習不如意焉用文章為君尋古  
人物信有陵谷悲擾擾不自適會為後世嗤促節無窄  
袖緩歌逐鳴絲自美亦自惡貴賤吾不知縱談劇虛舟  
快飲若漏卮人生但如此為樂自一時誰言冬夜長俛  
仰星漢移念無千金壽愧子勤稱詩

答黃寺丞紫薇五言

紫薇異衆木名與星垣同應是天上花偶然落塵中豔  
色麗朝日繁香散清風嫵媚雖自喜幽寂逝將終主人  
謫仙籍浩歌滄浪翁卜居抗靜節寒秀憐芳叢猗猗庭  
中華固為悅已容如何又將去含意默忡忡青苔侵履  
綦搖落知歲窮獨賴君子德庶幾甘棠封

曲陽亭送別

海濱寂寥地送別何須頻數上曲陽亭自然愁旅人晴  
日排寒色清光湛薈淪微風海上來滿目飛魚鱗孤雲

去無所野鳥鳴相馴信美非吾土送目倦南津

寄貢弟

勁雲翔空林積雨荒茂草哀鳴聞離獸驚棲見羈鳥時  
逝運自頽物壯勢還老感至境寥愴悲來色枯槁玩此  
豈有極辨之苦不早如何復傷別咫尺成遠道

和弟自京師來

四海無風濤五年再相逢會合如此難況我罹百凶悲  
端素填膺觸事淚滿胸欲言不能語豈知涕所從良久



得仰視恍忽如夢中非復平昔遊豈復平昔容危生若  
霜葉懔懔待烈風不有親戚歡其如憂患攻破啼強為  
笑意氣徒衰翁慰爾友于情急難義所隆

送秦州通判陸學

秦地天下險秦兵天下強曩在景祐末叛國正陸梁渡  
河窺中原不見飛鳥翔漢將雖城守覆沒猶相望時秦  
獨高枕毫髮無所傷豈惟形勢然固亦任使良近者敵  
已弱旄頭滅無光尚須得猛士分命修封疆陸子吳中

賢英英富文章作人易感激遇事殊軒昂舊知軍中樂  
復愛邊地涼不忍京塵間著書鬢毛蒼拜疏如終軍請  
纓督羣羌大笑朱買臣衣錦憐故鄉旌旗導前車絲竹  
鳴後房指呼百夫走談笑千里康雖云半刺史其實專  
一方古來功名奇偶不可常得時或幸會微賤升廟  
堂況君閱詩書智策未易量協心得元帥展意輸所長  
朝廷酬勲閥曾不矜銀黃他日重見君非復東觀郎

貢甫在京口阻潮未渡

向晦月消魄楚濤為之衰坳堂無深涉客子緩歸期吟  
遶沙步闊眺賞秋山時大川奔南島落日明西垂登高  
既易賦懷古豈難詩喟彼一帶阻積此三歲思何當命  
海若利涉慰調飢

淮西延平以詩見寄因書陝城即事用酬來唱

陝郊古云重雄勝地所該羣山左右顧大河西北來府  
署憑中高一日萬景開是時八九月秋色清池臺樽酒  
雨餘酌笙歌雲際回追歡緬前會真樂非昔陪賓客雖

日過禮俗多嫌猜于焉備廚傳安得忘形骸神交與心  
賞懷舊何悠哉

送獻臣是時獻臣侍親之淮南予亦且侍行臨荆  
州獻臣先從東門出故有此作

風土樂荆楚塵埃倦都洛東遊欣邂逅勿復驚離索尚  
悔不同舟令人慙李郭

送客不及

欲折楊柳枝贈言別所思日落飛鳥息孤帆奔何之行

人樂前途何以寬我懷還將別離思吹示橫笛兒

送隣幾

日沒崑邱峯月出滄海波區區三萬里相望能幾何一  
出仍一處一合復一離正爾人間世無復歡笑時子行  
何忽忽將老思所試恨我無羽翰不能省君治黃河從  
天來太華出雲上登臨若相思寄聲問無恙

送彥猷

蒼蒼南山桂歲暮獨華滋非無棟梁用道遠莫致之黃

雀巢其巔螻蟻穴其卑全生亦以遂匠石空復悲兩唐  
邁青節千歲接光輝珪璋固特達鴻鵠佳羽儀庶幾朝  
廷老出入王者師何事江湖間浮沈衆人爲我實牛馬  
走不能強繫維欲往路苦艱愴茲四愁詩

送直溫

終軍西入關棄繻笑路旁丈夫貴成名用此還故鄉雖  
無魯儒操意氣殊激昂稚齡如頽波詎忍鬢髮蒼古人  
汝南秀契闊升我堂宿昔夢生翼已排九門翔未盡復

來歸帝閤隔微茫  
高卧三年暗忽隨  
南風揚萬里快超  
詣豈知道路長  
努力戒後時相勸不可忘

送攷生

遭遇爵位輕  
治平進取難  
不見明經士  
白首成一官  
憐爾吾家駒  
學問知所安  
得名萬衆中  
奮迅生羽翰  
天子臨廣廷  
公卿肅衣冠  
傳呼署甲乙  
誰不傾目觀  
我時忝陪侍  
趨拜玉座前  
鄂秀茅亦榮  
不自知欣懽  
勿言勢尚卑  
無以地固寒  
鸞鳳魯棘棲  
蛟龍亦泥蟠  
孟軻稱三樂

富貴不與焉恨我不如爾千鍾益悲歎奈何方遠別浩  
蕩江湖間臨分豈自勝流涕空汎瀾

送楊十一公緼之延平

寡欲求易給縱心居常安一為淮陽卧及再芳歲單處  
事非事事居官豈官官念以拙者效而為朝責寬故人  
懷英邁撫轡辱盤桓心期謝外獎談笑用為歡淹泊遂  
將永望舒毀其團別君感袍繫更欲愁且歎

送王國卿



功名世所濟時節不可遲夙昔聞斯語至今良獨疑筋  
力與時背進取將願違譬如寶燕石無用于重貲不恨  
歲月晚畏為豪俊嗤見君復感歎吾道其如台古之英  
賢人隱顯亦不齊出處各努力悠悠慰我思

送子南

南師鼓琴者餘力推步精千里求知音徒步入王城能  
高頗自負一一游公卿朝廷富貴人寵辱心若驚聞至  
必解榻招邀劇生平以茲祿命術獨得當時名朱絃與

素徽棄置莫為聽  
往往默自撫或疑非斷聲  
紅塵車馬中  
隨俗翻營營  
振衣忽長歎  
吾已知時情  
卷橐卻東下  
野風蕭然清  
且賸山水意  
永待鍾期生

公是集卷十二

欽定四庫全書

公是集卷十三

宋 劉敞 撰

五言古詩

幽懷

山梁鳴雌雉節物春已深  
故花稍辭枝新葉漸成陰  
流光不可挽四序密相尋  
今晨已非昔明日豈復今  
自我  
愜幽獨放言冥此心  
胡為復屢嘆孔聖有遺音

送隱直侍行陝郊

相如忽將老推輓竟無力如何羈旅後棄我復遠適  
病束我身送子恨不得時登高邱望塵土蔽西北山河  
繞秦隴關陝入胸臆形勝懸眼前顧盼生感激指陳出  
圖像踴躍効功績朝廷厭兵久勉上平戎策

九月三日遊樂郊作五言贈同遊

昔在西省直常有中園思今來非吾室猶稱宣城詩  
芳郊後搖落秋初尚華滋丹竇何纂纂黃花復離離  
俯見

淵魚翔仰觀雲鳥嬉物性附所適吾生亦爾期置酒得  
同好追勝不知疲和歌涼風起看舞白日移興言想邨  
壑弱喪慚旌麾負郭如辦此懷金寧足為

夜月露卧

微月翳西林繁星燦如錦歡言戀清景展席不遑寢涼  
風能相期沆瀣若可飲勞生傷局促徂歲急苒苒為君  
捐萬慮高卧且安枕

因李點同幕中諸君過車輞湖步行野間

山野宜獨往出郭愧賓從終為吏事役猶與賢者共平  
湖色清淺霜落冰始凍遠郊氣氤氲臘近春稍動鳥飛  
甚閒暇獸起或驚縱愛此去人遠相勸解君鞍崇岡象  
嶠阪宿莽似雲夢游目際天地褰裳凌菰葑吟非騷人  
怨賞及舞雩誦塗遠意逾適笑彼阮籍慟

適野

夏至無與適驅馬出東城漸去市井喧稍增耳目明風  
勁山瘦高露寒水澄清造景不及言暢然得此生姓名

謝朝隱出處與物冥  
豈伊漁樵合鳥獸  
亦不驚待此用  
卒歲優游諧我情

挽葉翰林

翰林氣英發博學起徒步  
初射東堂策已稱濟時具  
出入三千歲差池千一週  
青雲得自致白眼與俗迕  
勁節凌秋旻玄文匿深霧  
尺璧可令毀堅石難使鑄  
董生膠西相賈子長沙傳  
終疑希世才良用制作誤  
銜悲去修門  
缺望動行路  
落落長松姿  
歲晏悴霜露  
平生慕高名  
邈

近隔清晤心許千金劍無由挂君墓

端居

端居亦無賴幽賞每多違扁舟試獨泛鷗鳥肯相依日暮無所詣興盡復還歸

答黃寺丞九月二十一日出郊

閉關予非用適野子能謀勿言雅俗異卒歲共優游清詩狀景物秀氣豁霜秋篇終寄一笑因以緩心憂

讀三國志



獨夜一卷史上尋千歲間咄嗟興廢更俯仰朝市遷古  
人病無聞愚智矜後先共樂無窮中正如朝露然向觀  
功名際自以皆萬年邇來令人悲蚊蚋過目前安得謝  
浮俗高舉凌九天捐書以絕學寄心崆峒仙

十二月二十一日雪中早朝

海風水犀飛中夜滿城雪聞雞倒衣起猶謂庭下月出  
門望天地高下同瑩潔念非汗漫期驅馬正迷轍我本  
江湖人雲端想華闕今來恍自失旅唱空愁絕

得彥文書將遊吳中

微霜下芳草日月逝逾邁青青松與柏歲暮兩相對念  
我平生遊孤懷用慷慨誰言千里近引領若海外清潁  
流東南浮雲向吳會臨風意莫展將子多自愛

寄王子堅時在寢邱治東臯

達人視天下輕重如浮雲震雷不經聽蟲飛寧足分吾  
慕龐德公谷口自耕耘身世兩相棄放言麋鹿羣此風  
久難尚之子今復聞我亦問津者滔滔遠慙君

菊花枕

鮮鮮秋菊花  
粲粲黃金錢  
採掇時苦晚  
棄遺情所憐  
道人教為枕  
示可以延年  
早昧攝生術  
恐為多病纏  
又從省俗事  
視聽苦不便  
往往發昏憤  
未知所除蠲  
但使寐無覺  
不謂藥可痊  
今者誠有遇  
祕之慎其傳  
愈風得難老  
高卧齊古賢  
作詩叙終始  
物薄戒輕捐

答張洞推官

憂患使志衰  
羈旅哀年邁  
夙昔仰高山  
邇來得傾蓋  
孤

游幸無恨三益良有待惠我金玉音醒如濯聾聵悵然  
反自感久矣病昏憊微君念氣臭誰與振管蒯聆弦感  
英韶觀海憚珍怪內省終懸磬無由報雜佩

洪州黃推官

江表山水區南昌神仙宅固宜生賢俊邈與塵土隔昔  
在君伯氏實為萬夫特文采何輝煌聲名盛赫奕差池  
中道天冥漠神理默德業誰與倫天倫自準的龍蟠豈  
終潛鳥伏必遠擊君今鍾其美遠到未可測

聞官輸竹箭毛翎

邊兵未云備競矜弓弩強斯人久銜恩獻力固所當上  
山伐檀樂入林候飛翔豈無解網心大義須勤王安得  
會稽嶺集居共工旁安得解羽澤在君禮義鄉  
羽有大澤剪翎副之箭一一堅且良朝發摧西戎夕發斃東  
羌不煩天下民萬里坐寧康

秋日

平日日在簷今日日在堂西風稍已急百草不復芳蟋

蛭何獨悲戚戚鳴四牆客子多所感中夕起徬徨貧病  
自早衰何必秋氣涼心憂不能眠非惟寒夜長

桐軒晚坐

孤軒遶危桐颯颯聞闌雨驚起視前除飛花亂如舞輕  
香密伊席晚景容當戶玉粉散游蜂珠華濺高宇紛紛  
綠苔上半已隨泥土邈彼丹穴鳥何年翥文羽芳時不  
可驟歲晏聊容與

李觀以太學助教召曾鞏以進士及第歸俱會郡

下素聞兩人之賢留飲涵虛閣

孤鸞方北游威鳳復南翔邂逅中道遇其音何鏘鏘太  
平向百年此固多美祥擾擾都人士爭先顯輝光雖無  
醴泉流江水清且長雖無朝陽桐翠樹茂且芳念將萬  
里逝願得少徜徉為君賦卷阿因以謝楚狂

秋晴

浮颿解重陰白日麗青天凜凜秋氣蕭蕭蕭風景鮮脂  
車駕我馬覽物往于田幽興未能盡中途復來旋古人

不可及獨往祇自憐豈若偃吾室優游以忘年

曉晴

朝光出屋角鳥雀聲正喧天寒未能起緼袍有餘溫  
智士困朝市勇士敝中原自古貴高卧豈嫌長閉門

送蔡奕同年

功名貴早達時俗輕小官念子兩未適出門何獨歡  
古賢有祿仕先聖戒色難義嫌固為美勢卑豈足歎  
采蘭歲云暮接浙心不安宛轉腰間絲崔嵬頭上冠  
車馬有



光輝里閭有聳觀勉旃愛玉體自致青雲端

送裴煜同年

裴侯江海士往者未相識但聞太學生素號萬人敵羣  
雄會南宮精鑒動宗伯先鳴氣軒昂一日聲烜赫青雲  
開岐路黃鵠張羽翮多幸旅後陳同時被親策指縱聽  
高論洒落駭餘力不意沈下僚于予有愧色蘭臺校中  
書幕府贊婉畫起家固多榮負米輕遠役此心古人少  
于義吾子得秋風感羈旅道遠思自適

送楊闢同年

昔在谷子雲語妙氣縱橫遨遊五侯間談笑臨公卿丈  
夫伸知己未必老一經懷寶迷其邦古人誰謂平楊侯  
東州客三歲不飛鳴雖沓二府書續紛委弓旌結勒西  
入關長揖謝諸生風霜豈不永意氣故自輕伊昔惟一  
劍蒯緱吐悲聲當今代舍長見我珠履榮

秋月

暮歸欲投息明月強我行越陌復度阡古人知此情叩

門童奴走升堂兒女驚呼酒徑就醉益復招友生不可  
不與飲子真勝公榮顧聞四壁間絲竹金石聲此非孔  
子居那得爾鏗轟夜闌興不盡積雲解我醒噫嘻王子  
猷浪得千載名

韓文公畫像分題

微言昔廢絕大道隨荒榛上下千歲間天將復斯文若  
人實命世述作參鬼神橫制萬里波不為流俗珍大音  
破昏聾有若雷霆震惜乎世莫用竟以奇怪聞哀哉揭

陽貶勢屈道則伸孔子亦有言求仁而得仁我昔讀其  
書固常見其人邇來觀遺像忽若平生親輪扁不言巧  
丹青豈復真尚存高山意俯仰冀日新

楊十一沒後重登見山樓有感

平生交一臂觀化此山川俯仰成陳迹高低俱絕絃浮  
雲杳何處衰病兀蕭然擾擾紅塵合誰予慰目前

卧北牕下讀書

高枕北牕下柴門晝仍闕偶有微風至欣然解人顏暝

目恣遠想超遙出塵寰自昔太古來幾人得此閒讀書  
取適心名譽非所攀堯跖本不辨況乃章句間牛羊死  
牢策麋鹿安深山牧性有不齊何知智與頑

寄贛

相去不在遠百里若異方相別不在久一日如歲長我  
昔不願仕會知出處妨因循竟不免密勿猶自強默默  
抱遠志悠悠視流光豈知泰雞鷺止欲歸稻梁飛鳥呼  
其儔羈馬憶故鄉況茲平生懷奔走非所望朝吟在子

邊夕夢居子旁歲暮菽可採云誰助傾筐桑落酒當熟  
誰復共稱觴忽忽無一歡昏昏坐中堂拂衣告言歸念  
彼穉且狂作此聊自娛我思不能忘

八月六日寄鄰幾諸君

謬為天官屬得與選事親略計三百州綠衣九千人

今日

以前在  
曹人數

較材迷長短守法愧因循救末知不足澄源力

難伸諸君備鄉老多士競國賓鑒形肖止水播物參洪  
鈞解論皆造微詳延必逢真仰成寬吏責端本慰吾民

功則太平始任非百職倫聚精會冠劍重鎗閔埃塵寄  
重地必禁問迹疎無因風雨何蕭蕭雞鳴夜將晨一日  
如三月況茲別累旬

寄王深甫

前日君遠遊相憐每獨悲寧知君未返自笑還若茲賢  
者易姓逃聖者微服馳聖賢不必容吾道其如飴浮舟  
潁水清遠與塵囂違卜鄰西郊郭得近樵漁期主人文  
章伯聲望高一時平生莫往還見我如舊知勢與年俱

忘胸中坦無疑人當意氣展何有憂寒飢反思萬類情  
糾纏未易推向者雖定居睽孤常不怡邇來暫奔走師  
友足自持物或損而益吾又何怨為且苟無陳人吾豈  
能至斯歲窮景蕭條多感令志衰須君濟其弱嗟子何  
當來

風雨寄貢甫

積雨不自已季秋聞驚雷行子方遠道憔悴感我懷流  
潦紛縱橫高岡蔚崔嵬左右無所覩出入蒿與萊百步



一躑躅十步一徘徊村墟斷人煙沈竈或產蛙日月懸  
一隅雲霧安得開天遠人事邇勞生使心哀獨不如鳬  
鵠奮翼起高飛相望空長歎撫襟泣如頽

寄王深甫

城東與城西相去咫尺耳不得同朝夕譬如隔山水況  
茲歷三秋正復累百里念我誰與遊悵然豈能已古人  
稱莫逆未必居密邇自嫌感豫深更失笑談理寡陋使  
心憂空虛見人喜觀過而知仁且當謝君子

寄論翊

走馬平舒道初日明三峯嵐光共淡蕩千丈青芙蓉伊  
昔臨畫圖但愛神仙蹤安知復壯麗翰墨難為工我行  
天地間異景曾此逢至今想見之秀氣常沖融世事勞  
人生壯年成老翁山中定見佳恨未與君同

寄永叔

永叔後予  
數日使北

俱持強漢節共下承明殿相從不相及相望不相見平  
生慕儔侶宿昔異鄉縣展轉多遠懷恍惚猶對面桑乾

北風度冰雪捲飛練古來戰伐地慘澹氣不變贈君貂  
襜褕努力犯霜霰一尺握中策無由奉深眷

寄鄰幾

昨日非今日今吾非故吾  
盡鳴知歲晚鬚變哀年徂萬  
事異俯仰達者與化俱故人  
千里外高義獨何如眷眷  
尺素書湛湛雙酒壺勸我加  
餐食示我長相於可憐平  
生好不異東西居我今心如  
結那得從公舒

寄佑之

長安風塵地見子若舊交意氣何激昂骨幹真蒲梢戎  
馬擾邊封殺氣連二嶠丈人國長城多壘憂四郊勁兵  
向海西千里沸鼓鐃共傳校尉印勇略如虎虓功業繫  
感激念當覆妖巢秋風日夜清敵人知折膠努力張國  
家寄聲慰衡茅

寄貢甫

貧別書信闊接壤如天涯沉憂心腸窄少日如歲時食  
荼苦在味集蓼辛在外百感從中生通夕不遑寐世路

豈飄風游子常轉蓬鏡中見二毛何啻非老翁晚慕馬  
少游結廬守鄉井簡略或易足長當並形影

寄張宜

福州人教弟子數  
百人多成進士者

張君于福樂先進野人也曩者吾見之大驚彼何者鬚  
眉交蒼白被服必儒雅故善殷周間不居王鄭下諸士  
多及門之子獨在野食有脫粟飯出無款段馬鄉閭行  
雖高時俗知亦寡昨聞修庠序造士繫陶冶斯人宜聘  
起可以專楚櫓養賢須勤渠風教隨用舍望君萬里餘

誰謂我心寫

寄阮二舉之楊十七彥文

我昔居宋都潛有伐樹憂不期得君子卒歲同優游楊  
生舊相知情分故綢繆阮公出傾蓋而肯如白頭古人  
有忘年嗟我非此儔譬如羔袖微豈可參狐裘知人視  
其友孔聖稱焉庾所以梁楚間亦聞東家丘相從未云  
厭相別難自留贈我數百言精神露蛟虬楊子期我用謂  
當佐王侯阮公推我文云可齊尹歐斯言豈易當斯道

豈易求奈何千金珠中夜而暗投書紳願自勗雜佩非  
可酬欲知相憶心淮水清悠悠

寄楊阮

中堂明華燈宥坐湛清酒筆硯居我前史籍在我後君  
知我不樂我念平生友強醉誰與歡悵然夜將久

溫柑

后皇富佳樹柑實掩羣衆磊落驪珠圓參差金壺重剖  
丹瓊瑤碎蓄潤霜雪凍封苞萬里險照耀高堂供憶昔

伯禹籍蒼茫闕斯貢及乎騷人賦流落遺爾頌反登橘  
柚輩海物隨錯綜圖謀迷萬世不平竟誰訟頗疑古未  
有彼故得豪縱溟海通蓬萊近由仙者種又疑美過絕  
讒口斥不用寂寥三王時此理彌可痛安得舉其族北  
遷越巖洞歲比萬戶封蠲煩與人共

贈山僧

貧病不出門趣與時俗乖高卧謝賓客秋葉忽滿階今  
旦為誰埽釋子遠見懷問我平安否曠然外形骸疎疎



意如真語淡情反諧旅人非一感及爾能安排聞道常  
愧晚智也豈有涯他日更解榻虛談慰心齋

達師

師雖支離流于道乃全人未當事感豫來者自欲親時  
時平是非往往動精神縱橫及萬事慷慨驚四隣乃知  
全一身不必山野民乃知憂當世不必朝廷臣語默兩  
有適動靜皆可循彼哉小丈夫孰能識吾真

喜晴寄彥猷

積陰向十日不見江南山何意浮雲盡依然庭戶間芳  
草晚已歇瑤華初可攀故人在遠道悵望凋朱顏

永叔西齋送沖卿知陝府

得華字

我求一州牧竟至無津涯相看佩銅虎似欲凌青霞分  
陝本相事憇棠成棣華

君元兄大資政  
于陝有遺愛

優游山河勝肯

厭多風沙

後出郊二首

人遠地形曠氣收天宇高不辭乘興出直恐應接勞送

雁時揮弦羨魚復臨濠君知適意樂未悟生二毛

歲晚農事畢里閭競歡然相見有餘情獨游頗忘年上  
懷羲皇世下感沮溺賢豈以六金印而輕二頃田

黃詩中頗

有田野  
意故及

### 涼榭許道寧畫山

許生擅邱壑融結隨毫端醉埽堂上壁參差皆可觀飛  
雪暗連峯對之中夏寒吾能捐萬事于此聊盤桓

公是集卷十三